

KOMUNIKABIDEAK. Otamendiri eta Aizpuruari elkartasuna helarazi diete beste komunikabideetako kideek

Hedabideetako zuzendariek adierazpen askatasunaren urratzea salatu dute

Elkarriketa batean galdera bat egiteagatik bi kazetari inputatzea «zentzugabekeria» dela adierazi dute

G. Olaizola / I. Etxeberria | DONOSTIA

Euskal Herriko komunikabideek gogor kritikatu dute Auzitegi Nazionalak Martxelo Otamendi eta Mertxe Aizpuru EGUNKARIAko eta Gara-ko zuzendariari inputatu gisa deklaratzera deitu izana, ETako ordezkariari elkarrizketa egiteagatik. EGUNKARIAk egindako delari erantzunez, hedabideetako ordezkariak elkartasuna helarazi zieten Otamendi eta Aizpuruari. Ondoko iritzietan ageri ez badira ere, *El Mundo del País Vasco* egunkariak eta Bilbo Hiria Irratiak ere bat egin zuten. Galdera bat egiteagatik bi kazetari inputatzea «zentzugabekeriatzat» jo zuten, eta adierazpen askatasuna defenditu zuten.

JUAN JOSE BAÑOS ('Deia'-ko zuzendaria)

«Auziak aurrera egingo balu, logikatik kanpo egotea litzateke»

«Noren buruan sartzen da herri honetan eta edozeinetan galdetzea delitua izatea? ETari edo munduko beste erakunde edo pertsona bati elkarrizketa egitea edozein kazetariren edo hedabideren zereginetako bat da. Hori ez ulertzea lanbide hau ez ulertzea da, eta badirudi Garzon eta Fungariñok ez dutela ulertzen. Norbaitek eragozten diolako elkarrizketa bat egin zezakeenak ez egitea, hori profesionaltasunari uko egitea litzateke. Ez dut uste bihar zuzendariari ezer gertatuko zaienik, baina deialdia egite hutsarekin bidegabekeria eginga dago. Auziak aurrera egingo balu, logikatik kanpo egotea litzateke».

HUR GOROSTIAGA ('Euskal Herriko Kazeta'-ko zuzendaria)

«Botere judizialaren eta eragilearen artean ez dago mugarik»



«Espainiako Justiziak hirugarren munduan garapen bidean den herri baten itxura du. Ez dago mugarik botere judizialaren eta eragilearen artean. Bere helburu politikoak lortzeko, bide guztiak baliatze-ko prest dago. Berriz ere saia-

tzen ari dira, kriminalizatzek asmoz, eta nork daki zein helburu duten. Beharbada, laster Hego Euskal Herriko kazetari guztiek artikulak publikatu aitzin zentsuraren ministeriotik pasatu beharko dute, Francoren garaian bezala. Erabat sinestezina litzateke, orain artekoak ikusi ez bagenitu».

JOSE GABRIEL MUJICA ('El Diario Vasco'-ko zuzendaria)

«Adierazpen askatasunerako eskubidea ezin utzizko printzipioa da»

«Ez dago demokraziarik adierazpen askatasunik gabe, eta ez dago askatasunik komunikaziorik gabe. Hedabideek gertakarien eta herritarren arteko bitartekari eginkizuna betetzen dute, eta bitartekaritza horrek eginkizun hori informazio-neutraltasuna irizpidetzat hartuta betetzera behartzen du, legeak betetzetik ondorioztatzen dena eta irakurleek beren konfiantzarekin ematen dutena beste juzgurik onartu gabe. Adierazpen askatasunerako eskubidea ezin utzizko printzipio bat da gizarte demokratiko guztietan, aldeztu beharrekoa da bidezko desadostasun ideologikoetatik harago, eta muga bakarra du, indarreko legedia errespetatzea. Demokrazia- eta askatasun-sistema batean, Justiziaren eginkizuna da ustezko edozein delitu argitzea, baina bidezko zeregin horrek betiere legalitatearen errespetu zorrotzean oinarrituta egon behar du, adierazpen askatasunari bidegabeki kalte egitea ekar dezakeen edozein gehiegikeria saihesteko».

IÑIGO MUÑOZ ('El Periódico de Alava'-ko zuzendaria)

«Galdera batengatik kriminalizatzea basakeria da»

«Galdera batengatik kriminalizatzea basakeria da. Kazetari batek baino gehiagok gustura egingo lioke ETari elkarrizketa bat. Abc-ek Hamas-eko buruzagi bati elkarrizketa bat egin zion, eta inori ez zitzaion burutik pasatu ere egin elkarrizketa-tzaileak bere galderetan delitua egin zuenik, inork ez zuen era-

baki ETB epaitzea ETari egin zion elkarrizketarengatik, ezta BBC ere. Ez dut uste inputazioak aurrera egingo duenik, ez dudalako uste zuzenbidearekin bat datorrenik. Ez dut ulertzen zergatik zabaldu den berriro auzia. Azterketa zehatzagoak egin ez gero, esan behar da Laugarren Atala orain zalantzan dagoela. Lehen terrorismoaren apologia delitua egotzi zioten Aizpuru eta Otamendiri, baina orain hilketa egitera bultzatzea. Astakeria da».

PELLO ZUBIRIA ('Argia'-ko zuzendaria)

«Ez da erraza ulertzea Auzitegi Nazionalaren barruko saltsarekin zerikusia duen edo ez»



«Bi zuzendarien kontrako inputazioa izan zitekeena bota zuen atzera ekainean Garzonek, eta orain inputatu egin ditu Auzitegi Nazionalak. Ez da erraza ulertzea Auzitegi Nazionalaren barruko saltsare-

kin zerikusia ote duen edo ez. Bestalde, Auzitegi Nazionalan eta tartean zenbait epailek euskal prentsari ematen dioten tratu ere jakina da. Horrek ez gaitu harritzen. Kasu honen atzetik bultzada politiko bat dagoela nahiko argi du jende askok Euskal Herrian, eta ikusiko da ea Espainiako beste askok zer esaten duten. Hasieratik egon da EGUNKARIA eta Gara estigmatizatzeko gogo. ETako buruzagien elkarrizketa bat egiteagatik auzipetzea, hori European ez da inoren buruan sartzen».

PABLO MUÑOZ ('Diario de Noticias'-eko zuzendaria)

«Ez du sostengu legalik, ez politikorik, ez etikorik»

«Zentzugabekeria da. Ez du ez hanka eta ez buru. Ez du sostengu legalik, ez politikorik, ez etikorik. Hainbeste gorabehera izan dituen sumario batean, une politikoa aprobetxatzen ari dira —irailaren 11, Europako Batasuneko presidentetza— astinaldi bat emateko. Kazetari batek eskubide osoa du nahi

duen pertsona elkarrizketatzeko eta nahi duena galdetzeko. UPNren inguruko galderak delitu izan daitezkeela esatea dena aldrebestea da».

ODILE KRUZETA (Euskadi Irratiko zuzendaria)

«Adierazpen askatasunak giro iluna, tristea du gure herrian»



«Nekeza egiten zait elkarrizketa batean deliturik egon daitekeela imajinatzea. Baina kasu hipotetiko zail horretan ere galderei erantzun dienak egingo luke delitua, inolaz ez galderen egileak. Akusazio latza egin dute, ordea, Mertxe Aizpuru eta Martxelo Otamendiren kontra, galdera batzuk egiteagatik. Hilketa eragin dutela leporatu zaie, eta inputatu gisa deitu dituzte. Ez da onargarria inondik inora. Onargarria ez den bezala gure herriko beste hainbat kazetari heriotza mehatxupean eta bizkartzainekin bizi behar izatea. Adierazpen askatasunak giro iluna, tristea du gure herrian».

ANDONI ORTUZAR (EITBko zuzendari nagusia)

«Hedabideen bitartekari zeregina kolokan jarri dute»



«Gara eta EGUNKARIAko zuzendariari 'hilketa eragitea' egotzi eta inputatu gisa deitu ondoren, ekainean Fiskaltzak euren kontrako kereila jarri zuenean egin nituen adierazpenak gogoratu eta berretsi nahi nituzke. Orduko kereila zentzugabea zen, eta oraingoa ezin da ulertu. Norbaitek galderak egiteagatik delitua egin duela onartzea oso zaila egiten zitzaidala esan nuen orduan. Delitua egitekotan, galderari erantzuten dionak egingo du, ez galdetzen duenak. Berriro ere mezulariaren zeregina, hedabideen bitartekari zeregina kolokan jarri dute. Euskadin kazetari askok ETaren mehatxua dela-eta pairatzen duten presioa gutxi balitz bezala, orain

LANGILEEN DEIALDIA

Elkarretaratzeak bihar

EGUNKARIA eta Gara-ko langileek elkarretaratzeak egingo dituzte bihar Euskal Herriko bost hiriburutan, adierazpen askatasunaren alde. Elkarretaratzeak goizeko 11:00etan izango dira. Baionan Espainiako Kontsuletxearen aurrean izango da, Iruñean Udaletxe plazan, Gasteizen Andra Mari Zuriaren plazan, Donostian Artzain Onaren Katedralaren aurrean, eta Bilbon Arriaga antzokiaren parean. Bi egunkarietako langileek ohar bat kaleratu dute. Honako hau dio: «Gogor salatzen dugu bi zuzendariak eta Jon Abril EGUNKARIAko kolaboratzailea pairatzen ari diren erasoak. Beraien aurkakoa ez ezik, euskal herritarren aurkakoa ere bada, adierazpen askatasunaren aurkako erasoak izanik guztien aurkakoa baita.

Herrialde totalitarioetan bezala, kazetari izatea ezinezko bihurtzen ari da Euskal Herrian. Bestela, nola ulertu behar da Joni, Auzitegi Nazionalaren aurrean Ttipi-Ttapa telebistarentzat irudi batzuk grabatzeagatik, talde armatuari laguntza ematea leporatu eta sei urteko kartzela zigorra eskatzea? Edo Martxelo eta Mertxeri ETari egindako elkarrizketa bateko galdera batengatik erakunde armatua 'hiltzera bultzatzea' egotzea? Beste garai batzuetan boterearekin bat ez zetozei jazarri eta zigorra jartzeko erabiltzen ziren argudio eskas berak dira, justizia inpartzial baten aurrean inolako funtsik izan- go ez luketenak.

Erabat sostengatzen ditugu Martxelok, Mertxek eta Jonek bezala kazetari lana zintotasunez egiten dutenak. Aurrera segituko dugu euskal komunikazio esparrua garatzen eguneroko lanean».